

1498 piarum omnium partem fuderunt, Joanne Gradonico, qui eis præerat, interfecto, captis compluribus: reliqui, Savornianus Tarfiasque qui erant Cassinæ, veriti ne interciperentur, tormentis abductis se se Pisas contulerunt, atque ad muros castris positos constiterunt. Iis intellectis rebus Senatus exercitu restaurando Guidum Ubaldum Metaurensem ducem suam in militiam adscivit, cui stipendium esset in equites cataphractos ducentos, levis armaturæ centum, auri libræ annuæ centum septuaginta. Petrum autem Marcellum legatum declaravit, qui Urbinum accurreret, ut Guido Ubaldo præsto esset, militesque mille in ejus finibus conscriberet. Tum, quod Petrus Medices Patribus significaverat, quoniam Urfini propinqui sui pacem cum Alexandro fecissent, si ei pecunia in stipendium subministraretur, illos se omnes, quocunque opus esset, adducturum: Senatus ea de causa Petro Medici pecuniam decrevit, equitesque Græcos, qui æstiva in agro Taurisano habebant, quique tum e Græcia venerant, in Flaminiam mittendos censuit, ut alio itinere Pisas contenderent: nam per Ludovici fines unum modo militem, aut omnino nuncium eo Patres mittere non poterant: quando is & itinera clauserat, & omnes tabellarios excutiebat atque intercipiebat, ne Senatus certior illis de rebus fieret. itaque nihil jam novi Pisis afferebatur, compluresque dies magna earum rerum ignorantio Senatum tenuit. Emanavit tamen hoc, Florentinos cum Genuensibus Ludovico procurante fœdus percussisse, quo ex fœdere Genuenses littora Florentinorum ab reipublicæ classibus tuta reddere tenerentur. Neque multo post eorum magistratus Marco Beatiano, quem antea Senatus Genuam miserat, asperioribus verbis denunciavit; se nunquam passuros, ut in reipublicæ imperium Pisæ redigantur. cui Beatianus respondit, *Minus injuste eos & Ludovicum facturos, si semel injurii in rempublicam fierent, fœderum & societatis, quam Diis hominibusque testibus sanxissent, læsæ atque violatæ nomine: nunc illos dupliciter peccare atque delinquere: semel in eo, quod infideliter*

*deli-*